

Thursday, June 19, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

COOPERATION MINISTER

Cooperation Department changtu Minister Pu PC Vanlalruata chuan tung leh sapthei chin lamah hmalak chho mek a nih thu a sawi.

Vawiina Dawrpui Multipurpose Centre, Aizawla Mizoram State Cooperative Union General Assembly Vawi 36-na a hmanpuinaah he thu hi sawiin Minister chuan tung leh sapthei chu tunhnaiah hralhna a that thu sawiin ching turin loneitute an hrih thu leh tunah hian hma lak chhoh mek a nih thu a sawi a. Tung leh saptheia hma la thar mek chu intelkhawma society anga ding tura a duhsak thu leh an intelkhawm chuan an chak dawn thu a sawi a. An intelkhawm chuan thiltih a awlsam dawn thu leh khawl mamawh thut a awm pawha society anga lei chu a awlsam zawk thu a sawi a ni.

Minister chuan Mizorama Cooperative Society ten an mamawh ber chu tanrual a nia a hriat thu a sawi a. Tanrual chuan chak zawkin hmalam a pan theih thu a sawi a. Cooperative movement lamah thangthar lehkathiam zawk te a tam thei ang ber an tel a tul tawh thu a sawi a, kum upa lam ten sulhnu tha tak tak nei mahse chak taka cooperative movement a than zel theih nan thangthar te hnuhluh a ngai tih a sawi a ni.

Mizoram State Cooperative Union hi kum 1975-a din niin kumin hi a kum 50 na, Golden Jubilee kum a ni a. Hetihrual hian harsatna avangin Annual General Assembly chu neih theih loh kum a awm zeuh zeuh avangin vawiin assembly hi a tun 36 na a ni thung a. An hnuaiah hian kum 2024 atanga kum 2025 chhungin Annual fee pe, society 211 an awm a. State level Cooperative Society 9 leh District level Cooperative Society 1 an awm bawk a ni.



INTERNATIONAL DAY OF YOGA

Mizoram University Yoga Centre Co-ordinator Prof. Sanjay Kumar chuan International Day of Yoga atan University chu kawng hrang hranga an inbuatsaih thu a sawi.

Vawiina Akashvaniin a kawmnaah Prof. Sanjay Kumar chuan he thu hi sawiin International Day of Yoga pualin hun hrang hrang buatsaih a nih thu a sawi a. Tun thla ni 7 atanga tan khan Yoga Training cum Workshop Programme (Shivir) in Common Yoga Protocol chu International Day of Yoga pualin Inrinni thleng awh turin Yoga Centre, Mizoram University-ah buatsaih a nih thu a sawi a. Vawiin khan International Day of Yoga pualin Elocution Competition buatsaih a nih thu sawiin thupuiah zirlaite nuna Yoga pawimawhna 'Importance of Yoga in Student's Life' tih hman a nih thu a sawi.

Prof. Sanjay Kumar chuan tun thla ni 21, International Day of Yoga vawi 11-na chu Mizoram University Multipurpose Hall-ah zing dar 6 leh minute 15 atangin hun an hman tan dawn thu a sawi a. An hun hman tur chu a lawmna pui ber Prime Minister Narendra Modi-a hoa hman tur zawm chung a an hman dawn thu a sawi a. A ni puala inkhawm tawi hman bakah a huhoa Yoga exercise lak, Mass Yoga Practice an tih dawn thu a sawi a. He programme-ah hian Mizoram University zirlai bakah zirtirtute an tel dawn thu a sawi a ni.

Prof. Sanjay Kumar chuan Mizoram University huamchhunga zirlai leh zirtirtu tam takin nitin Yoga hmanga an insawizawi thin thu a sawi a. Nun hrisel zawk neih nan tangkai takin Yoga chu an hmang thin a ni a ti.



POWER CORPORATISATION

Power & Electricity Department chu enkawl na felfai zawk leh chak zawka mipui tana hna a thawh theih na'n corporation atana dah turin chak taka hmalak mek a ni.

Ningani kal ta a Power & Electricity Minister Pu F. Rodinglana hova department thuneitute thukhawm chuan P&E Department hmasawn na'n department ni lova sorkar hnuai a corporation a let turin chak taka hmalak an rel a. Minister chuan inrelbawl na tha zawk a awm theih na'na corporation-a dah chu ZPM sawrkar thiltum zinga mi a nih thu sawiin mipui leh sawrkar tan kalphung tha zawk a thlen dawn a ti a, hemi kawngah hian chak taka hma la turin department hotute a chah a ni. Hemi chungchanga hmalakna kal zelah hian ruahman ang chuan Generation, Transmission leh Distribution ah te then hran tur a ni a, heng Strategic Business Unit (SBU) hrang hrangte hian anmahni chanpual theuh an enkawl dawn a, hemi mil hian department sawi danglam pawh kalpui tura rel a ni a, a theih anga midang kuta hlan leh midang enkawl tura pek tura hmalakna pawh kalpui tum a ni ang.

An inrawnkhawmna a an tarlan danin he ruahmanna hi sawrkar laipui duhdan leh Electricity Act 2003 in a sawi anga siam niin hetiang hnathawh tur bik chang tura in siam thar a nih chuan SBU hrang hrang te hi anmahni hna theuhah an in sawrbing thei dawn a, inrelbawl na tha zawk nei tura ruahman niin kawlpheha sem chhuah bothlau pawh tlahniam tura beisei a ni.

Nikum March thlaa Assembly thutkhawmah P&E Minister Pu F. Rodinglana chuan a department enkawl chu corporate lam an hawi tan thu sawiin tuna in se zawl chhuah ngawt theih a nih loh thu a sawi a. An hmalakna kawng tinrengah intodelh phawt turin ruahmanna an siam thu leh, an hmalakna kawng tinreng chu corporate lam hawi a nih thu a sawi a ni.



LMC PROPERTY TAX

Lunglei Municipal Council-a Property Tax pekna tur Apps chu vawiin khan tlangzarh a ni a, Kum khatah cheng vaibelchhe 1 leh nuai 5 vel hmuh beisei a ni.

LMC Property Tax hi vawiin khan Executive Councillor Pu Zorinsanga Hmar chuan LMC BoC Hall ah a tlangzarh a, property tax kalpui dan turah hian In thar apiang a man a sang dawn a, Mobile application hmang a man pe thei lo tan Local Council-ah emaw LMC office ah pawh pek dan tur ruahmanna siam ani dawn a, Thuneitute sawi danin property tax hi za zela 5% chu LMC ah a lut dawn a, a bak 95% chu ward chhunga hmasawnna hnathawh nan a kal dawn a, parking fee pawh mumal taka khawn tum a ni.

Chhiah lut tur beisei zat hi kumkhatah cheng vaibelchhe 1 leh nuai 5 vel niin surveyor 24 ten Local Council 24 intinah survey an kalpui dawn a, Chhiah khawn tur chungchangah hian hian thla khat chhung complaint na tur hawn a ni dawn a, chhiah khawn hi August thla atanga bultan theih beisei a ni.



PM MODI

Prime Minister Narendra Modi chuan Croatia ram a tlawh chhungin India leh Croatia inkarah inzawmna tha leh nakin zelah ram pahnih te inkarah thawhdunna a awm theih nan hmalak a nih tur thu a sawi.

Prime Minister Narendra Modi chuan Croatian Prime Minister Andrej Plenkovic chu hmuin ram pahnih te inkarah chak zawka hmalak a nih theih nan thawhdunna thuthlung an ziak a. kuthnathawh leh hnam ziarang hmanga inpawhna tha zawk neih tura hmalak te, tunlai thiamna kawnga hmalakte tawng inhlutsak leh chawisan kawngah thawhdunna an ziak a ni.

